



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

MOELETSI OA BASOTHO


PARARE DOMINO PLEBEM PERFECTAM

**Moorosi o tiisa
tšehetso ea 'muso**

2

**Mafapha a
itlhophela boemo**

5

**DCEO E QALIPOLLA LEKUNYA**www.moeletsioabasotho.co.lsRe se re fumaneha ho
marangrangEmail: newsroom@moeletsioabasotho.co.ls
Tel: +266 28350466/ Whats app: 62600983

MOELETSI

'Metlakhola o lebisa ha habo

Kahar'a Melao ea Morena Molimo e leshome, oa bosupa o re "u se ke ua utsoa, ntho ea motho e mong u se ke ua e nka. Tse utsoitsoeng le tse sentsoeng li batla pusetso." Ho thoe moja pele o tsoana le moja morao. Hore o atleha bophelong ke hobane o sebelitse ka thata. Ho ngoliloe ho thoe motho o tla phela ka mofufutso oa phatla ea hae. Hona hore o le motho o lokela ho sebetsa ka thata e le hore o tsebe ho atleha bophelong esita la bohle ba lelapa la hae.

Ho thoe matsatsi a chaba ka ho fapana, etsoe a ho utsoa a mangata empa la ho tsoaroa le leng. Seriti sa hau se ka theoloa feela ke bosholu le bomenemene boo o bo etsang, o nahana hore o masene ka ho etsa boqhekanyetsi athe se tla o pitla.

DCEO ho bonahala hantle hore e phahamisa le mafika ho ntša le tsona liphepheng, hona ho bolela hore ha ho sana sekoti sa ho ipata. Mokhethooa oa Lekhotla la Puso ea Sechaba (DC), o hlatsisoa bokhothorotho ba chelete ea ileng a e fumana ka boqitolo ho 'muso oa ka nako eo. Ke bomalimabe ho ithuisa ka likhafa tsa sechaba, tseo ba li fufulleloang hore naha e tsebe ho itjara linthong le ho ntlafala. Setho se khahane ke seo se etsa se khahlanong le molao oa Morena Molimo.

Ha se khala haholo ha monna e mong ho tsoa Afrika e bohareng a le teng kahar'a naha, ho tla bapatsa Naha ea Lesotho. Joale motho o ipotsa lipotso li hana ho felela, hore na Lekala la Bohahlauli le kae ha tse li etsahala? Na kahar'a Naha ea Lesotho ke hobane ho sena bana ba Basotho ba ka etsang mosebetsi oo ka mokhoa oa marang-rang?

Naha ea Lesotho ke naha e ntle haholo ntlheng ea bohahlauli, e-na le libaka tse ngata haholo tse ka hohelang bahahlauli ea ba moruo oa eona ho tlocoma, le sechaba se fumana mesebetsi ka bongata bo hlolang. Re mpa re hloka feela batho ba ka e behang mapeng oa lefatše ka bophara.

Haele moo LDTC le Lekala Labohahlauli ba tla kopana ho tshola maoala a ka sebelisoang ho ntlafatsa bohahlauli, ke taba e khothatsang e nang le chebelopele. Naha ea Lesotho e-na le libaka tse ntle haholo tse ka khahlang batseteli, Taba e-na haele mona le borakhoebob ba tlo fua monyetla oa ho hlahisa lihlahisoa tsa bona pepeneneng joaloka lijo tsa Sesotho, mesebetsi ea matsoho, boqapi ba setso e tla atolosa bohahlauli kahar'a naha.

Bophatlalatsi lefatšeng ka bophara, ke letsoho le letona la 'muso kapa puso, haholo ea sechaba ka sechaba. Ke bona bo nkang litaba ho 'muso ebe joale bo li fetisetse ho sechaba se tsebe ho rua tsebo. Mosebetsi oa bophatlalatsi ke ho fana ka litaba tsa 'nete tse sa nkeng lehlakore, li le mpe kapa li le ntle.

Letona la Likhokahanyo o khothalitse bo-ralitaba kamor'a hore ho be le e mong oa baphatlalatsi a koeteloe. A re taba eo ea ho koeteloe ea e mong, e se fokolise boitlamo ba bona mosebetsing o ho batla litaba le ho fa sechaba sena tsebo esita le ho se fahlolla. A re mosebetsi oa bo-ralitaba ke ho sebetsa ka boitšepo le ho latela melao ea boitšoarole ho tlaheha ka boikarabello. A re ha se hantle hore e be bophatlalatsi bo fumana litšoso tsa mofuta ofe kapa ofe.

Kahare ho Kereke e Katholike hona le likopano tse ngata haholo, 'me kopano ka 'ngoe e na le mosebetsi oa eona o e ipabolang ka ona. Mosebetsi eohle ha se hore ke tlohisano, empa ke ka moo li thehetsoeng sona hore li phethe litaba tseo. Likopano tsohle li filoe thomo ea ho etsa mesebetsi ea boapostola e leng etsoang ka lerato la Jesu Kriste a itlameng ka senyepa sa tumelo.

Kopano ea Baena ba Setefane (BASA) bana le litšiea tse tharo e leng besebeletsi, borapeli le boapostola, 'me ke tsona tseo ba itšetlehileng ka tsona. Mokete ke o moholo oa sehopotso sa lilemo tse 60 Mobabatsehi Emmanuel Mabathoana OMI a ne a hloka hahale, 'me BASA e ikakhetse ka matla a maholo ho atlehisa liphehiso bakeng sa mokete oo.

MOLIMO A BOLOKE LESOTHO LE BASOTHO



Moorosi o tiisa tšehetso ea 'muso

Nthabeleng Seithleko

Letona la Likhokahano, Mahlalele Tšebeli-so ea ona, Mohlomphehi Nthati Moorosi, o tšepisitse hore 'muso o tla fana ka tšehetso e felletseng boitekong ba ho loantša tšekefetso ea bo-ralitaba le ho theha tikoloho e sireletsehileng, eo ho eona baqolotsi ba litaba ba ka phethang mesebetsi ea bona ntle le tšabo kapa litšoso tsena o li buile ka la 7 Loetse

monongoaha.

Letona le khothalelitse baqolotsi ba litaba hore ba lule ba tiile, 'me ba se lumelle ketsahalo ena ho fokolisa boitlamo ba bona mosebetsing oa bo-ralitaba, le ho tsoela pele ho latela melao ea boitšoarole ho tlaheha ka boikarabello.

Moorosi o boetse o tiisitse bohlokoa ba bo-ralitaba ho tsebisa sechaba le ho matlafatsa puso ea sechaba ka sechaba, le hore baqolotsi ba litaba ba lokela ho lula ba le sebete e bile ba sebetsa ka boitšepo ho pheth-

ahatsa boikarabello ba bona sechabeng.

Mohlophisi ea ka sehlo-hong oa Leselinyana la Newsday, Lerato Matheka, o re koetelo le tlhoko-fatso tsa mosebeletsi oa Koranta ea habo, Kananelo Boloetse, li na le matšoa a liketso tsa litho tsa tšireletso tsa Lesotho.

O re ba fumane ka mehloli e tšepahalang hore bahloko-fatsi ba Boloetse ba beile besebeletsi ba Newsday leihlo, ho kenyeletsa le karolo e 'ngoe ea batlelehi ba litsi tse ikemetseng tsa litaba.



Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHILENG (LUKE 1:17)

EMAIL: editor@moeletsiobasotho.co.ls
sub-editor@moeletsiobasotho.co.ls
Mohale Lehlohonolo (Sub-editor)
(+266) 58 771 507 / 62 771 507

Journalists

Nthabeleng Seithleko

Tšeliso Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404



Mazenod BOOK CENTRE
Prepare good People for The Lord

27 350 562 / 57396597 (whatsApp)
bookcentre@mazenodprinting.co.ls



akello
LIBRARY



SCHOOL BOOKS


now available on the Akello Online Library!

Here's how to access them:

1. Download the Akello Reading App.
2. Search for the book you want.
3. Purchase or subscribe online.
4. Download the book

Enjoy reading offline anytime on the Akello App.

<https://library.akello.co/>



MOELETSI O TŠEHETSA BACHA

Tšeliso Thakholi

Basali ba ntseng ba le bacha haholo lilemong 'Maliteboho Phello (21) le 'Matšepang Ponto (23) ba Ha Thetsane seterekeng sa Maseru, ba ikopantse ho phelisa malapa a bona ka ho theha khoebo e ikhethang e bitsoang Lehakoe Crafts, e etsang lintho tse ngata tse fapakaneng ka lepolanka le pampiri.

Mafumahali ana a rekisetsang Ha Thetsane haufi le selika-likoe sa likoloi, ba etsa lintho tse kang lifaha, masale le lireng se khabisitsoeng ka makhetha a maholo, tse e ntsoeng ka pampiri le mapolanaka ho latela hore na moreki o batla mofuta ofe. Ka thoko ho mona, ba boetse ba etsa le lirulara tsa bana ba likolo tsa mapolanka, likhaba, mafehlo, masokoana le lintho tse ntle tse tšoarang linotlolo. Ba lokolisa tsa tšebetso ea bona tjena:

TŠEBETSO

Mosebetsi ona oa ho khabisa le ho etsa lintho tse fapakaneng ka pampiri le mapolanka re o etse sekolong, ra ba ra etsa le botaki kaha ke liea-thoteng li bapile. Ha re qeta re bile le lehlohonolo la ho fuoa mechini e meraro e le ho qala tšebetso, ha pele



re qalile ka ho iketsetsa ka matsoho, 'me e ne e se mosebetsi o motle haholo papisong le hona joale.

MOHOPOLO OA HO QALA KHOEBO

Mohopolo oa ho qala khoebo ena e ikhethang ea masale a matle a mapolanka le lipampiri, e qalile ha re ntse re le sekolong ka Limkokwing re etsa botaki le mekhabiso, moo re neng re atisa ho bona lithole tse ngata tsa lipampiri le mapolanka a lahlole hohle mona. Ra utloa re khathatsehile haholo, kaha a mang a se a bakile bohlasoa haholo. Ke ha re tla batla boeletsi le ho fumana lithupelo, hang ho ba re lumellane ka ho theha khoebo ea pele ea mofuta oa eona kahare ho teropo e kholo ea Maseru.

Sepheo se seng e ne e le ho fokotsa litšila le ho etsa

hore basali ba ke babe batle, ka ho roala masale a etsoang ke bana ba Basotho kahare ho Naha ea Lesotho. Boqapi bona e boetse ke keketseho ea mosebetsi kahare ho bacha ho ba ke bona batho bao re hlileng re ba shebileng haholo.

MEFUTA EA MASALE

Har'a e meng ea mefuta ea masale eo re'a etsang a entsoeng ka pampiri e sothehileng ebe rea e penta ka mebala e fapakaneng, masale a lifaha tse nyenyane tsa lipampiri, masele a manyenyane a khabisitsoeng a e ntsoeng ka mapolanka, masale a maholo bakeng sa manyalo a entsoeng ka libopeho tse fapakaneng.

Mohlala: e kaba lekhasi, mokorotlo ho latela hore na moreki o batla mofuta ofe. Thepa tsena tsa rona li sa ntse li fumaneha ho rona kahare ho toropo e kholo ea Maseru. Kaha re se ntse re le bacha haholo khoebong ha re e-s'o be le sebaka se khethehileng sa moo re rekisetsang teng. Empa re fumaneha mapatlolong a Maseru kaha re sa ntse re le baitšokoli.

SEPHEO

Sepheo ke ho sebetsa ka thata ho nyolla tlhahiso e le hore selemong se tlang re be re ena le moo re rekisetsang teng. Ntlo eo re ntseng re e sebelisa bakeng sa ho etsa lihlahisoa tsena ke ea lapeng moo ke lulang, 'me re ile ra etsa tumellano e ngotsoeng ea hore re ka sebelisa

liphaposi tse peli bakeng sa ho etsa thepa ena ea rona. Hape re ne re shebile le mokhoa oa tšireletso bakeng sa bosholu, kaha mecheni eo re e sebelisang e theko e boima haholo.

THEPA

Thepa eo re e tsang lihlahisoa tsa rona e theko e bobebe haholo, kaha lipampiri re ithoananela tsona mabenkeleng mona ha li ntse li lahloa, kapa ho li reka ka theko e tlase. Mapolanka le ona re a fumana ka bobebe ho bahlahisi ba likampani tse kholo tse etsang thepa ea katlung. Re inkela feela mapolanka a sena a sebelitse kapa ho ithekela ona.

BAHAHLAULI

Re hlokometse hore bahahlauli ke bona ba rekang lihlahisoa tsa rona haholo ho feta Basotho. Ka nako e 'gnoe ba qeta nako ho sa rekoe empa e

sebetsa ka eona bakeng sa tlhahiso ea boleng. Re se re atleha ho isa bana likolong. Qholotso e kholo ke ho hloka sebaka kahare ho Motse-Moholo Maseru, moo re ka rekisetsang teng.

Re na le tumelo ea hore khoebo e ne e ka tsamaea hantle, kaha kahare ho toropo batho ba bangata ba hlahang literekeng ka ho fapakana, 'me sena se ka thusa khoebo ea rona ho hola ha ho rekoa ka bongata. E boetse e tla thusa hore batho ha ba batla mofuta e itseng ea masale le masokoana, ba li fumane sebakeng sefe ka litheko tse tlaase.

HO BACHA

Bacha qalang ka se senyenyane seo o ka bang le sona. U se ke oa emela mohlolo oa ho qala ka lichelete tse boima tseo ho ke keng ha eba bonolo hore o li fumane hang hang. Mocha se



re mohlant bahahlauli ba fihlang ba reke ka bongata. Bahahlauli ba fumana thepa ea rona ha bobebe ho ba re potoloha le Maseru. Re boetse re ne re tseba hore ho tliil'o ba le mojao oa lithuthuthu, 'me sena se tliil'o re thusa haholo ho nyolla khoebo kaha bahahlauli ba tla be ba le bangata.

LIKATLEHO LE LIQHOLOTSO

Likatlheho tseo re seng re li fihletse ka 'nete li 'maloa. Ea pele ke hore re ile ra fumana mpho ea mechani ena eo re ntseng re

ke oa etsa lintho tsohle o le mong, fumana bacha ba bang ba nang le monahano o tšoanang le oa hao oa ho qala khoebo, e be le ea ikopanya le sebetsa 'moho ka litsebo le mahlale a fapakaneng.

Ka hona le ka tseba ho fenyha mathata a tlhokahalo ea mesebetsi ena e re tjametseng re le bacha ba seng ba ena le malapa le senang ona. Ba ntseng ba kena likolo, ha le qeta ho fumana mangolo se keng la emala ho hiroa, itlha-hisetseng mesebetsi ka ho iqalla likhoebo tse ratoang ke lona.



Mafapha a itlhophela phetoho ea boemo



likotsi, boitokisetso, kara-belo le tsosoloso.

A re karabo le tsosoloso kamor'a likoluo hangata li hloka chelete e ngata, li hloka lisebelisoa tse ngata, 'me li beha khatello meahong le basebetsing. O itse ho itokisetša koluo ho sa le pele ho sebetsa hantle e bile ho tsoarella ho feta ho emela hore koluo e etsahale pele ho nkuoa khato.

Ho sa le joalo, Mot-samaisi oa nakoana oa Lefapha la Bolepi, Mathatela Ntsatsi, o itse thupelo ena e bohlokoa, kaha e tla shebana le chebelopele ea nako ea lipula e tlang, hammo-ho le ho lekola hore na mafapha a kenyeletsa makala a 'muso, ba ile ba arabela joang ka chebelopele ea selemo se fetileng.

Morero oa 'Early Warning Systems II' hajoale o ntse o lekola literekeng

Nthabeleng Seitlheko

Letona la Tikolo ho le Meru, Mohlomphehi Thabo Mofosi, o ipilelitse ho bohle ho sebetsa 'moho ho netefatsa hore likotsi tse bakoang ke phetoho ea boemo ba leholimo le litemoso tsa pele li kenyelelitsoe mererong ea naha le liqetong tsa bohlokoa.

Letona Mofosi o buile tsena ha a bula thupelo ea matsatsi a mahlano ea 'Early Warning Systems', e kopanyang mafapha a fapakaneng ka la 7 Loetse monongoaha.

O itse 'muso o ke ke oa atleha ho sebetsana le phetoho ea boemo ba leholimo o le mong, empa o hloka tšebeliso 'moho le sechaba, lihoai le baetapele.

O boletse hore tšebeliso ea lintlha tsa boemo ba leholimo ka nako e nepahetseng, e thusa ho sireletsa bophelo ba batho le phephelo ea lijo. A re ho kenyelletsa tlhahiso leseling ea maemo a leholimo liqetong tsa letsatsi le letsatsi, ho ka thusa ho fokotsa litšenyehelo tsa likoluo nakong e tlang.

Ho latela chebelopele ea nako ea selemo, libaka tse bohareng le tse ka bochabela tsa naha, li lebelletsoe ho fumana pula e tla ba maemong a

tloaelehileng kapa a holimo ho tloaelehileng.

Letona le boetse le lemositse sechaba ka chebelopele ea maemo a leholimo ea selemo sa 2026, e bontšang monyetla oa ho hlaha ha El Nino, e ka su-

Lefapha la Taolo ea Likoluo (DMA), Reatile Elias, o itse chebelopele ea nako ea selemo e na le karolo ea bohlokoa lefapheng la boemo ba leholimo, kaha boleng ba eona bo iponahatsa ka

sumetsang nako ea lipula ea mafelong a selemo sa 2026 le qalong ea 2027.

Leha ho le joalo, o khothalelitse sechaba hore se lule se khobile matšoafo, a hlalosa hore El Nino e bontša feela monyetla o eketsehileng oa hore pula e be ka tlase ho tloaelehileng, eseng hore komello e tla ba teng ka sebele.

Ka lehlakoreng le leng, Mookameli e Moholo oa

hato esale pele, a re sena se thusa ho sireletsa le ho baballa mehlooli ea bohlokoa, meaho le bophelo ba batho. O itse mokhoa ona oa ho itokisetša esale pele ke motheo oa phokotso ea

tsela eo e tolokoang le ho fetoleloa ka eona liket-song tse ka thusang mafapha a fapakaneng.

O itse mafapha a kang temo, taolo ea mehloli ea metsi, phallo ea batho le bophelo bo botle ba sechaba, a lokela ho utloisisa likotsi tse ka 'nang tsa ama mafapha a 'ona, e le hore a tsebe mehato e lokelang ho nkuoa.

Elias o totobalitse bohlokoa ba ho nka me-

likotsi tsa likoluo, o ipapitseng le litšiea tse hlanoh: thibelo, phokotso ea

tsa Mafeteng, Quthing, Qacha's Nek, Thaba-Tseka, Mokhotlong le Leribe.



ESTATE NOTICE

Notice is hereby given in terms of section 61(b) of the Administration of Estates and Inheritance Act No.2 of 2024; **Estate Late 'MEFANE' MONAHALI E1197/2025**

Notice is hereby given in terms of section 61(b) of the Administration of Estates and Inheritance Act No.2 of 2024; calling upon all creditors of the deceased to lodge their claims with the administration of the deceased's estate within thirty (30) days of this publication.

The address at which the said claims can be lodged is mentioned hereunder;

ADDRESS: MASITE NEK HA MAJANE
MASERU 100
CELL NO. (+266) 63 139 428
NAME: MPUSENG 'MONAHALI

Amerika e tšehetsa Lesotho

Nthabeleng Seitlheko

Mokhatlo oa World Vision Lesotho, Leka-la la Bophelo, Boemeli ba Amerika Lesotho le mekhatlo e ikemetseng ea bolumeli, ba hokahane 'moho ho thakhola lenaneo le reretsoeng ho thu-

be letsete, le reretsoeng ho matlafatsa tsamaiso ea bophelo le ho ntlafatsa litšebeliso tsa bophelo.

O boletse hore Naha ea Amerika e itlamme ho fana ka chelete e ka bang M80,000,000.00 selemong sa pele sa lenaneo lena la lilemo tse hlano. A re chelete ena e tla thusa haholo ntoeng khahlanong le HIV, haholo-holo thibelong ea eona, hammoho le mananeo a

batho ba moo.

E tla boela e thuse ho matlafatsa bokhoni ba basebeletsi ba bophelo sechabeng le ba fanang ka litšebeliso tsa bophelo maemong a pele. O re FCI e tla shebana haholo le HIV, lefuba, bophelo ba basali le bana, ka ho sebelisa mekhoha ea ho fana ka litšebeliso tsa bophelo sechabeng.

A re lenaneo lena le thehiloe ho sebetsana le

Ka hona, mananeo 'ohle a bophelo a sebetsang kahar'a naha a lokela ho ipapisa le boikarabello bona.

Letona le boletse hore Lesotho le hatetse pele toantšong le khahlanong le HIV, moo naha e seng e fetile sepheo sa 95-95-95. A re lekala le itse katleho ena e lokela ho fetisetsoa le likarolong tse ling tsa tsamaiso ea bophelo, e le ho matlafat-

pano ena e bile teng nakong eo linaha lefatšeng ka bophara li ntseng li shebana haholo le ho ikemela, ho ba le boikarabello le ntšetsopele e tšoarellang. A re sechaba se batla litšebeliso tsa bophelo bo botle tse fumanehang habonolo le tsa boleng.

A re naha ea Lesotho le balekane ba eona ba ntšetsepele ba ntse ba batla mekhoha e mecha ea



sa le ho rarolla mathata a sechaba (FCI). Sena se hlahelletse kopanong e neng e tšoaletsoe Maseru, ka la 8 Loetse monongoaha.

H'a bua kopanong ena, Moemeli oa Naha ea Amerika Lesotho, Thomas Hines, o hlalositse hore lenaneo lena le tla nka lilemo tse hlano. A re FCI ke mohato oa bohlokoa tšebelisanong ea nako e telele pakeng tsa Amerika le Lesotho, o reretsoeng ho matlafatsa sechaba.

Hines a re lenaneo lena le reretsoe ho fetola thuso ea Amerika hore e

mang a bohlokoa a bophelo. "M32,000,000.00 e tla sebetsa ho matlafatsa esita le ho akofisa bophelo bo botle ba 'ma le lesea," a rialo.

A eketsa ka hore FCI e tla sebetsa ka tšebelisanano le mekhatlo ea bolumeli le ea sechaba, eo a bolelang ha e le eona mekhatlo e nang le likamano tse matla le batho metseng eo e sebetsang ho eona.

Ho sa le joalo, Hines o itse mekhatlo ena e ka thusa ho atametsa litšebeliso tsa bophelo sechabeng, kaha e tšepjoa e bile e tseba litlhoko tsa

likheo tse teng lefapheng la bophelo, leha ho le joalo, le ntse le tla tsamaisana le maano a naha.

Letona la Bophelo, Mohlomphehi 'Mamokete Ntšekhe, o re lenaneo le tla tsamaisana ka botlalo le merero le maano a naha a bophelo, ho qoba ho thehoa ha mekhoha e meng e ikemetseng ea ho fana ka litšebeliso tsa bophelo.

Ntšekhe o boletse hore ho fumana litšebeliso tsa bophelo tse theko e tlaase le tsa boleng bo botle ke boikarabelo ba 'muso, ho latela Molao oa Motheo oa Lesotho.

sa khokahano pakeng tsa basebeletsi ba bophelo sechabeng le litsing tsa bophelo tsa litereke.

Ntšekhe o boletse a re ho lokela ho be le maano a hlakileng a nang le lina-ko tse behiloeng, bakeng sa hore lenaneo le tsoele pele le sa itšetleha ka lichelete tsa kantle ka ho sa feleng. A re tšehetso ea lichelete e tsoang kantle e lokela ho tsamaea le moralo o hlakileng oa hore naha e tle e ikarabelle ka lenaneo nakong e tlang.

Mookameli oa Mokhatlo oa World Vision Lesotho, James Chifwelu, a re ko-

ho matlafatsa tsamaiso ea bophelo, le ho netefatsa hore litšebeliso li fihla ho batho ba li hlohang.

Chifwelu o re lenaneo lena le reretsoe ho ntlafatsa bophelo bo botle ba bana, malapa le sechaba. Kaholimo ho tsohle, o re lenaneo lena le reretsoe ho matlafatsa litšebeliso tsa HIV le AIDS, mananeo a bophelo bo botle ba basali, masea a sa tsoa hlaha le bana, mehato ea ho loantša lefuba hammoho le litšebeliso tse ling tsa bohlokoa tsa bophelo bo botle, ka mokhoa o shebaneng le sechaba.

Ba khothaletsoa ho hlahisa lihlahisoa tsa boleng



Nthabeleng Seithleko

Lekala la Khoebo, le Mesebetsi e Meholo le thakhotse ka molao Tlholisano ea Likhau tsa Naha tsa Boleng tsa Lesotho tsa 2026/27, ka sepheo sa ho khothaletsa boleng, tlholisano le ntšetsopele e ntlafetseng likhoebo tsa lehae.

Likhau tsena li tsoaroa tlas'a sehlooho se reng: Motheo oa Tlholisano le Ntšetsopele e ntlafetseng."

H'a bua lebitsong la Mongoli e Moholo oa Lekala, Motjoka Makara o itse ho

thakholoa ha likhau tsena ke mohato oa bohlokoa oa ho matlafatsa moetlo oa boleng kahar'a naha le ho ntlafatsa tlholisano ea khoebo tsa Lesotho.

O itse boleng ha e sa le taba ea boikhetlo moruong oa lefatše, kaha likhoebo li ntse li qothisana lehlokoa ka polokeho, botšephe le boleng ba lihlahisoa le litšebeletso tseo li fanang ka tsona.

Makara o hlalositse hore likhau tsena li fa mekhatlo monyetla oa ho tseba libaka tse hlohang ntlafatso, ho khothaletsa ntlafatso e tsoelang pele le ho aha moetlo oa bokhabane. O

itse boleng bo ntlafetseng bo tla thusa likhoebo ho ntlafatsa lihlahisoa le litšebeletso, ho khothaletsa boqapi le ho kenya letsoho kholisong ea moruo.

A re o hlokometse hore mafapha a kang temo, ho tšelo a ha metsi ka libotlolong, tlhahiso ea lihlahisoa le likhoebo tse ntseng li hlaha a hloka ho hlahisa thepa le litšebeletso tse fihlelang litebello tsa bareki le litekanyetso tse behiloeng.

O boetse a totobatsa bohlokoa ba litekanyo tse tšepahalang ho netefatseng boleng, a re tsamaiso ea naha e-na le seabo se seholo litabeng tse kang bo-

leng ba mafura, metsi a libotlolong le khoebo.

Makara o itse bareki ke bona ba ruang molemo haholo boleng, kaha ba lokele ho fumana lihlahisoa tse bolokehileng le tse tšepahalang.

O ekelitse ka hore ha bareki ba e-na le tšepo ho lihlahisoa tse hlahisoang kahare ho naha, ba tla rata ho tšehetsa likhoebo tsa lehae, athe bareki ba machabeng le bona ba ka khothaletsoa ho reka lihlahisoa tsa Lesotho. O khothalelitse likhoebo hore li se ke tsa nka likhau tsena e le tlholisano ea likhau feela, empa e le monyetla oa ho tseba libaka tseo li ka ntlafatsang ho tsona. O kopile mekhatlo ho nka karolo tlholisanong le ho ba mangosa a boleng, a hatella hore boleng ha se boikhetlo empa ke tlhokahalo.

Ho sa le joalo, Keneuoe Thamae, setsebi sa boleng Lefapheng la Boleng, Litekanyo le Melao, o itse likhau tsena li tla ananela mekhatlo e bontšang bokhabane tsamaisong le tšebetsong ea boleng.

Ho ea ka Thamae tlholisano e reretsoe ho khothaletsa likhoebo ho sebelisa mekhao e metle ea boleng,

ho ntlafatsa tšebetso, ho eketsa khotsofalo ea bareki le ho matlafatsa tlholisano ea tsona. O itse likhau tsena li boetse li reretsoe ho aha moetlo oa boleng likhoebo tsohle, le ho khothaletsa mekhatlo ho amohela ka boithaopo Molao oa Motheo le litekanyetso tsa boleng.

Thamae o re tlholisano e tla thusa mekhatlo ho tsamaisa mesebetsi ea eona ho latela litekanyetso tsa naha le tsa machabeng, e leng se tla eketsa tšepo ea bareki le bokhoni ba likhoebo ho qothisana lehlokoa mebarakeng. O supile liaparo le masela, boea ba nku le poli, lijo le tšebetso ea lihlahisoa tsa temo e le tse ling tsa mafapha a nang le monyetla e meholo ea kholo Lesotho.

O itse mekhahlelo ea Likhau tsa Naha tsa Boleng e kenyetse kampani ea selemo, bakeng sa likhoebo tse kholo le likhoebo tse nyenyane le tse mahareng (SMEs), hammoho le sehlahisoa sa selemo.

O hlalositse hore tšebetso ea likhau e tla etsoa ka mekhahlelo e 'meli, e leng boemo ba naha le boemo ba libaka. Bahloli ba tla boela ba fumane monyetla oa ho tsebahala Lesotho le machabeng ka lebaka la boitlamo ba bona boleng, ho khothaletsa basebetsi ka ho ananeloa ha seabo sa bona ntlafatsong ea boleng, hammoho le monyetla ea ho nka karolo mesebetsing ea SADC e amanang le boleng.

Ka lehlakoreng le leng, Qenehelo Lenka, oa Lefapha la Molao, o hlalositse boikarabelo ba lefapha, a re le ikarabella ho moralo oa naha oa meralo ea boleng. O itse lefapha le sebetsana le mananeo a ntšetsopele ea leano la naha la boleng, melao le meralo ea mekhatlo e amanang le boleng.

Lenka o itse sepheo sa lefapha ke ho matlafatsa bokhoni ba bahlahisi ba lihlahisoa ka ho theha meralo e matla ea naha ea boleng. O hlalositse hore meralo ena e akarelletsa, tlhahlobo, ntšetsopele ea litekanyetso, liteko le netefatso ea hore lihlahisoa le litšebeletso li latela lipehelo.

O itse litekanyo li shebane le ho netefatsa hore litekanyo li nepahetse, li'a tšepahala ebile li ka latelloa mohloling oa tsona, e leng bohlokoa ho fihlela litlhoko tsa tšebetso le litekanyetso. Lefapha le boetse le hlokomela boima le litekanyo, 'me le tsoara lithupelo tsa tlhokomeliso ho ruta bohle ka litaba tse amanang le boleng.

Our Shirts

Mazenod Tailoring
Prepare good People for The World

Timeless Designs. Tailored Confidence.

Wear your power

Place your order

TEL: +266 28 350 814

WhatsApp: +266 50757585

Email: tailoring@mazenodprinting.co.ls

Facebook as Mazenod Tailoring

PHYSICAL ADDRESS:

MAZENOD, HA PAKI

OPPOSITE POST OFFICE



Bohahlauli ke ntlafalo ea moruo

Nthabeleng Seitlheko

Mo k h a t l o
oa Ntšetso-pele ea Bohahlauli Lesotho (LTDC), ka tšebeliso 'moho le Lekala la Bohahlauli, Lipapali, Bonono le Bochaba, o tla tšoara pitso ea bohahlauli ea matsatsi a mabeli ho tloha ka la 16 ho isa ho la 17 Loetse, e le karolo ea mesebetsi ea ho keteka Khoeli ea Bohahlauli.

Pitso ena e reretsoe ho kopanya mafapha a fapakaneng a bohlokoa lekaleng la bohahlauli ho buisana ka menyetla ea matsete, boqapi, ntlafatso ea mebaraka le maa-no a ho ntšetsa pele bohahlauli Lesotho.

H'a bua 'mokeng oa bo-ralitaba ka la 8 Loetse monongoaha, Mookameli e Moholo oa LTDC, Mamello Morojele, o itse morero ona ke ho beha bohahlauli khubung ea boiteko ba ho hohela matsete, ho matlafatsa

boemo ba Lesotho e le naha e hloisanang hantle lefapheng la bohahlauli, le ho kenya letsoho ntlafatsong ea moruo.

O itse ketsahalo ena e tla boela e be karolo ea mekete ea ho keteka lilemo tse 60 tsa boipuso ba Lesotho, 'me e tla fana ka monyetla oa hore naha e bontše lefatše menyetla le bokhoni ba eona ba bohahlauli.

Morojele o itse pitso ena e tla kopanya bae-meli ba 'muso, likhoebo tse ikemetseng, batseteli, libanka, balekane ba ntšetso-pele, sechaba, bo-rakhoebobachaba le bankakarolo ba machaba lefapheng la bohahlauli.

O itse ho tla sebelisoa mokhoa oa tšebeliso ea libaka, moo mekhatlo ea bohahlauli le mekhatlo ea papatso ea libaka tse fapaneng tsa Afrika e ka Boroa e lebelletsoeng ho nka karolo.

Ho ea ka eena, pitso ena e tla bula menyetla bakeng sa sechaba, likhoebo tse nyenyane le tse mahareng hammoho le bacha ho nka karolo le ho rua molemo moruong oa bohahlauli.

O itse bo-rakhoebobachaba tla fumana monyetla oa ho bontša lihlahisoa tsa bona tse amanang le bohahlauli, ha ketsahalo ena e tla boela e khothaletsa ntšetsopele ea litsebo, boqapi le ho fihlela mebaraka.

Morojele o boetse a re pitso e tla shebana haholo le ho khothaletsa matsete, moo LTDC e batlang ho tseba menyetla ea matsete a bohahlauli e ka sebetsang le ho hokahanya beng ba merero le bo-rakhoebobachaba le batseteli le bafani ba lichelete. O itse lenaneo le tla kopanya lipuisano tsa boemo bo holimo le lipuisano tse shebaneng le tšebetso, ho kenyeletsoa likopano tsa khoebo le khoebo.

Ketsahalo ena e tla boela e bontše likarolo tse fapakaneng tsa moruo oa bohahlauli oa Lesotho, ho kenyeletsoa lijo tsa setso, mesebetsi ea matsoho, boqapi ba setso le boqapi ba marang-rang.

Mookameli oa Likamano tsa Sechaba oa LTDC, Molapo Matela o itse pitso ea bohahlauli e thehi-

loe e le karolo ea boikarabello ba mokhatlo ba ho khothaletsa le ho ntšetsa pele bohahlauli Lesotho. O itse sethala sena se tla kopanya likhoebo tsa bohahlauli hore li bontše mosebetsi oa tsona le ho tseba menyetla e teng lefapheng lena.

Matela o itse pitso e tla boela e hlahlobe hore na bacha ba ka sebelisa mahlale joang, ho nka karolo lefapheng la bohahlauli le ho kenya letsoho papatsong ea Lesotho.

O itse baeti ba tsoang Eswatini le linaheng tse ling ba lebelletsoe ho nka karolo ketsahalong ena, ha likhoebo tsa lehae li tla fuoa monyetla oa ho arolelana maikutlo mabapi le hore na Lekala la Bohahlauli le ka atolosa joang.

Mookameli oa lipapatso LTDC, Phomolo Lebotsa, o itse litokisetso tsa ketsahalo ea la 16 ho isa ho la 17 Loetse li ntse li tsoela pele hantle. O itse pitso e tla fana ka sethala moo mafapha a fapakaneng a bohahlauli ba ka arolelanang litsebo, ba buisana ka mekhoe-

ea ho holisa lekala le ho tseba menyetla ea tšebeliso 'moho.

Lebotsa o khothalelitse likhoebo tsa bohahlauli le bohle ba bang ho sebelisa monyetla ona ho bapatsa lihlahisoa tsa bona le ho bontša Lesotho e le sebaka se loketseng sa bohahlauli.

O itse ketsahalo ena e tla boela e hlahlobe mekhoebo eo bacha ba ka sebelisang marang-rang ka eona, ho bapatsa bohahlauli le ho iketsetsa menyetla lefapheng lena.

O itse Khoeli ea Bohahlauli ea 2026 e ketekoa tlas'a sehlooho se reng, "Digital Agency and Artificial"

Lebotsa o itse pitso e tla boela e shebane le ho matlafatsa tšebeliso 'moho ea bohahlauli tikolohong, le ho hohela baeti ba machaba le ba bohahlauli ho tla Lesotho.

Ketsahalo ena e lebelletsoe ho fana ka sethala sa hore bohle ba fetoletse bokhoni ba Lesotho ba bohahlauli hore e be menyetla e tsoetseng-pele bakeng sa batseteli, likhoebo, sechaba le moruo oa Naha.



TSA KEREKE

Ba phetha thomo

Tšeliso Thakholi

Ele ho phetha thomo ea bona ea ho etsa mesebetsi e fapakaneng ea boapostola e leng etsoang ka lera-to leo Kriste Jesu a itlam-meng ka lona e le senyepa sa tumelo, Kopano ea Baena ba Setefane(BA-SA) ea Parish ea Maria Mofumahali oa Lefaatše e har'a lihlopha tse supileng tsa Kereke tse tlii'o tsoara mokete oa 'mino oa bolu-meli o bitsoang Mabathoa-na Music Festival, bakeng sa ho bokeletsa liphehiso tsa ketekelo ea mokete o moholo oa sehopotso sa

ena ea lerato, kaha lerato ha le le teng tsohle li tsa-maea hantle, empa ha le lesieo tsohle ke lefela la mafeela. A re har'a o mong mosebetsi oa boaposto-la oo ba seng ba o entse ke ho tsoara mokete o tsoanang oa 'mino oa bo-lumeli le lihlopha tse ling tsa boithatelo bo botle, bakeng sa ho phallela le-lapa la bo e mong oa bana ea sa tsoa longoa ke lintja haufinyane haholo. Ona ke mohlala feela oa thomo ho bohle ba tsoailoeng ka letsoao la sefapano ho phetha liketso tsa lerato e leng tsa boapostola. E le ntšetsopele ea mosebetsi oa rona oa

la mokete o moholo oa Mobabatsehi Mabathoa-na. Se thabisang haholo ke hore hona mokete ona oa 'mino oa bolumeli ho tlabo ho binoe le tse ling tsa lipina tse Mobabatsehi, kaha e ne e le seqapi sa 'mino. Mobabatsehi Emanu-el 'Mabathoana OMI o tlahloa a qapile lifela tsa bakriste tse 40 tse kenye-letsang har'a tse ling Jesu oa ka kea tselo, Sefela sa Fatima, Bashoela-Tumelo ba Uganda le liphetoane tse ngata tsa Kereke li qapiloe ke eena. O boetse o qapile hape le lipina tse ling tsa linoto tseo e seng tsa lifela.



lilemo tse 60 Mobabatsehi Emmanuel Mabathoana OMI a ne a hloka hahle. Mokete ona o tlii'o tsoareloa Emmanuel Hostel, Maseru, ka la 12 Loetse monongoaha. Ho ea ka mookameli oa Baena ba Setefane, Mafisa Fobo o re Kopano ea habo joalokaha e le ea Kereke e Katholike e itšetlehile holim'a litšiea tse tharo e leng bosebeletsi, borapeli le boapostola. "Haele hantle ho re tlamang haholo ho latela melao le tsamaiso ea Kopano ke ho etsa mesebetsi ea lerato e leng ea boapostola, eo re seng re ntse re e tsoaetsa liko-pano tse ling tsa bacha tsa habo rona." A rialo. A re ha se lekhetlo la bona la pele selemong sena ba etsa mesebetsi

boapostola, o itse ba boetse ba tlii'o kenya letsoho le toma e ntse e le ho phehisa le ho atlehisa mokete ona o moholo oa Mobabatsehi 'Mabathoana, kaha kahare ho ona o kenyeletsa mekete e meholo e tlotlang letsatsi leo e kang ea peho ea baprista mokhahlelong oa Boprista bo Halalelang. A ipiletsa ho bacha bohle le ho batho ba baholo ho kenya letsoho ka mekhoea e mengata ho atlehisa mokete ona. Raliphatlatlatso oa Komiti e hlophisetsang mokete o moholo oa Mobabatsehi 'Mabathoana, Fr. Andreas Hlompho o tiisitse hore litlhophisano li se li hatetse pele haholo bakeng sa ho tsoara mokete ona oa se-metletsa, bakeng sa letlole

Thapelo ea Khotso

Oho Molimo oa toka le khotso, re hlonolofatse rona baahi ba Lesotho, 'me u re thuso ho phela khotso le leratong la hao. "Morena, nketse mesebeletsi oa khotso ea hao. Moo lehloeo le leng teng, ke jale lerato. Moo batho ba fosetsaneng, ke jale tsoarelo. Moo lipelaelo li leng teng, ke jale tumelo. Moo batho ba nyahameng pelo, ke jale tšepo. Moo lefifi le leng teng, ke tlise leseli. Moo masoabi a leng teng, ke jale thabo. Molimo oa ka, etsa hore Ke se ipatelele ho tšeli-soa, ke mpe ke tšelise ba bang. Ke se ipatelele ho utloisisoa, ke mpe ke be ea utloisisang ba bang. Ke se ipatelele ho rataoa, e mpe e be 'na ea ratang ba bang, Hobane ke ka ho fana, re fumanang, ka ho tsoarela, re tsoareloang. Ka ho shoa, re tsoalloang bophelo bo sa feleng. Amen."

2025-2026 SELEMO A

SONTAHA SA 24 HAR'A SELEMO



Siraka 27:33, 28:9
Pesalema 102
Ba-Roma 14:7-9
Matheus 18:21-25



Khothatso

Ho tsoarela ba bang

Re sa tsoa utloa thuto ea Jesu. O qeta ho hlalosa barutuo ba hae, hore ba tsoanetse ho phela ba itokiselitse ho tsoarela bana babo bona ba ba sitetsoeng. Joale Peterosi o botsa hore na re ka tsoarela motho ea re sitetsoeng ka makhetlo a makae? 'Me Peterosi o se a fane ka karabo; maitutong a hae, ho tsoarela motho ka makhetlo a supileng ke moeli o sa lokelang ho tlooa, mohlomong e se e le ho bontša moetsalibe mohau o fetang tekanyo. Jesu o mo araba ka hore mohau ha o na moeli, esita leha motho a ka u fosetsa ka makhetlo a mashome a supileng a metso e supileng, re tsoanetse ho mo tsoarela. Thuto ena e ne e le thata ho Peterosi le ho bapostola ba bang, 'me e ntse e le thata le ho rona. Joale, Jesu o hlalosa thuto ea hae ka papiso eo re sa tsoa e utloa. Thuto ke hore ha re sa tsoarela ba bang, Morena Molimo a ke ke a re tsoarela le rona. Ha re iphetetsa ho ba bang, Morena Molimo o tla iphetetsa joalo le ho rona. Ha re qeta ho utloa litaba tsa mohlankana enoa ea se nang mohau, re phakisa ho mo ahlola le ho re Morena oa hae o n'a nepile h'a mo halefela 'me a mo nehela bahloko-fatsi ho fihlela a lefa molato kaofela. Empa kajeno re tsoanetse ho hopola hore mohlankana enoa ea se nang mohau mohlomong ke rona. Kamehla ha re ipolela libe tsa rona, Morena Molimo o'a re tsoarela. Ha re e-tsoa moo, na re tsoarela batho bohle ba re sitetsoeng kapa rea ba hloko-fatsa, ho fihlela ba lefa 'me ba busetsa. Rona bakriste, balateli ba Kriste, re ke ke ra pholoha ha e se ha re ka fumana tsoarelo ho Molimo. Ke mang har'a rona ea ka ithorisang ka hore ha a hloke ho tsoarela hobane ha a e-s'o fose, ha a e-s'o tlole molao oa Morena Molimo? Ha a eo. Re ka lebala joang boemo ba rona, re le baetsalibe, ha ba bang ba re siteloa 'me ba kopa tsoarelo ho rona? Ha re rata ho ahlola ba bang ka thata, re lebala hore re baetsalibe, empa kamehla ha re ipolela libe tsa rona, re fumana tsoarelo ea tsona habonolo. Ha re rata ho iphetetsa, re lebala molao oa Kriste le mehlala ea hae. Re ka lebala joang ho tsoareloa ke Molimo, ha re sa rate ho tsoarela bana babo rona ba re sitetsoeng? Moapostola Joannes o re: "Mang le mang ea hloileng ngoan'abo ke 'molai, 'me le tsebe hore ha ho 'molai ea ka bang le bophelo bo sa feleng ka ho eena." (1 Jn 3, 15). Ho hana ho tsoarela motho e mong ke ho hana ho amohela tsoarelo eo Morena Molimo a ratang ho re tsoarela libe tsa rona ka eona. Morena oa rona Jesu Kriste o re file mehlala e mengata ea tsoarelo. O ne a qale ka ho re ruta ka lipapiso tse ngata hore tsoarelo e tsoa ho Molimo, 'me ke thato ea Molimo hore re tsoarelane. O n'a re rute thapelo ea hae e reng: "U re tsoarele libe tse rona, joalokaha re tsoarela ba re sitetsoeng." O ile a tsoarela Peterosi ea neng a mo latotse, Jakobo le Joannes ba neng ba tsekisana litulo tse kapele le Thomas ea neng a be lenama ho lumela. O ile a tsoarela Maria-Magdalena, mosali ea neng a tsoeroe a etsa sebe, lesholu le bakileng, esita le babolai ba hae. Kamorao ho Jesu, ka ho etsisa mehlala ea hae, batho ba bangata ba ile ba tsoarela babolai ba bona, joaloka bashoela-tumelo Stefane le Leurenti. Le rona re tsoanetse ho tsoarela joalo batho bohle ba re sitetsoeng, hobane ha ho ka moo re ka fumanang tsoarelo ea libe tsa rona kateng re sa tsoarela ba bang. Ha ho kamoo re ka ipitsang bakriste, re ntse re jarane ka lipelo. Tsoarelo ke tholoana ea lerato. Motho ea nang le lerato la 'nete o tseba ho tsoarela, athe e se nang lerato o rata ho busetsa molamu sefateng, o jara motho ka pelo, o rata ho iphetetsa. O etsa joalo hobane lerato la Molimo ha le eo ka ho eena. Ke Morena Molimo feela ea tsebang ho rata ka mokhoa o phethehileng, ke eena feela ea ka re rutanang tsoarelo ea 'nete, le ho leballana liphoso. Ha re bua ka ho tsoarela batho ba bang, re se ke ra hopola babolai feela, kapa batho ba re senyelitseng ka ntho e kholo, hobane litaba tsa mofuta ona ha li re hlalele hangata, 'me haeba li re hlalela, Morena Molimo o tla re fa matla a ho tsoarela batho ba re sitetsoeng ka ntho e kholo joalo. Empa re hopole batho bao re phelang le bona lapeng, bao re sebetsang le bona masimong kapa mesebetsing e meng. Ba soabisanang 'me ba siteloanang khafetsa ke batho ba phelang hammoho, 'me ke bona ba tsoanetseng ho tloaela ho tsoarelana. Ha re ithuta katekisisa, khaolong e buang ka Lenyalo, pontšeng e reng "Litsoanelo tsa monna le mosali lenyalong ke life?" Karabo e hlaha e re: "Litsoanelo tsa bona ke ho lula hammoho, ho ratana, ho tsoarelana..." Karabo ena ke bopaki ba hore batho ba phelang hammoho, ke bona ba sitelanoang ho feta ba bang, leha ba sa rate, 'me ke bona ba tsoanetseng ho ithuta ho feta ba bang molao ona oa ho tsoarelana. Ho malimabe banyalani ba sa itloaetseng ho tsoarela mohlaba ba qalang ho phela hammoho, hobane ba tla phela bophelo bo thata. Athe ba lehlohonolo ba ngolang tsoarelo e le molao oa motheo oa lelapa la bona, hobane leha mathata a le teng, ba tla tseba ho phelisana ka khotso le ka lerato.

Bahalaleli har'a Beke

14	Loetse	Cormac
15	Loetse	Mamilian
16	Loetse	Rogellus
17	Loetse	Uni
18	Loetse	Eumenes
20	Loetse	Pomposa

Lijabatho ha e-s'o lahle tšepo

Tšeliso Thakholi

Leha barati le batšehetsi ba bolo ea maoto ba lahlile tšepo ea hore sehlopha sa bolo ea maoto sa Lijabatho se tla fetela mokhahlelong o latelang oa litlholisanong sa Mohope oa CAF Champions League, kamor'a ho shapuo ke CFFA ka phafa ea 2-0 leotong la pele le bileng Naheng ea Madagascar ka Moqebelo, Lijabatho ha e-s'o lahle tšepo kaha e tlii'lo loana hore ho khaohe moo ho khoehang lebaleng la Dobsonville, Afrika Boroa, ka la 12 Loetse monongoa-ha ha e tla be e amohetse CFFA papaling ea ho qetela ea leotong la bobeli.

Tšepo ena ea Lijabatho e tekiloe pooaneng ke phala ea sehlopha Monghali Tankiso Moletsane, ea qalileng pele ka ho ikopela tšoarelo ho sechaba sa Basotho, haele mona ba khutla ba kobile linala ke ho sebetsa hampe papaling ea bona ea pele ea CAF Champions League. A re sehlopha ha sea bapala ho latela ka moo Basotho ba neng ba lebeletse ka teng empa leha ho le joalo, noha ha e ke e qaloa mokoting. Ka hona ba tlii'lo etsa sohle se matleng a bona ho hapa

papali ea leoto la bobeli. "Seo re se batlang ke tlhola e seng ho hong." A rialo.

A tiisa hore sehlopha sa Lijabatho se ke ke sa hlatsoa jesi e sa le qalong ea

hlopha sa bona nakong ena e thata e le hore se tle se fihlele tlhola. "Ke ka tšehetso ea lona re tla tseba ho atleha ho hlola papali ena." Ke Moletsane eo.

ke menyetla e mengata ea ho hlaba lintlha. E re kaha papali ea bolo ea maoto e'a makatsa metsotsong ea 60 ea karolo ea bobeli ea papali ke ha Harison Patrick

haeba e batla ho fetela li-papaling tse hlahlamang e lokela ho hapa papali eo ka 4-0. Haele tse ling tse bapetseng Mangarsport ea Gabon e hlotse African



litlholisano ha kana, kaha bahlangana ba ikemiselitse ho tla e hlanaka mafelong ana a beke e le hore ba tle ba tsebe ho fetela lipapaling tse ling tse hlahlamang. Leha ho le joalo, Moletsane o boetse a ipiletsa ho sechaba sa Basotho ho se lahle tšepo, kaha ntoa bohola e sa tla mafelong ana a beke. A ba kopa ho tšehetsa se-

Ha papali e thakhoha li-hlopha ka bobeli li ne li futuhelana, 'me ho bonahala maikemistso a ho hlaba lintlha. Barati le batšehetsi ba bolo ea maoto ba neng ba bohile papali kante le kahare ho naha, ba bone ha Lijabatho e bapala hantle feela ho hlaba lintlha e le bothata bo bohola. Leha ho le joalo, Lijabatho e hlotsoe

oa CFFA a hlaba ntlha ea bona ea pele.

E itse ha Lijabatho e leka ho tsoha rokong 'me e se e hlasela ka matla Fitahiana Vokatra a hlaba ntlha ea bobeli metsotsong ea ho qetela ea papali eba 2-0. Moletsaphala a e butsoela hararo ea ba papali e felile. Sena se behile Lijabatho tla sa khatello e matla ea hore

Stars ea Namibia ka 3-1, Wiliete ea Angola ea kakata Foresters ea Seychelles ka 4-0.

Haele Zamalek ea Egypt ea pola Port ea Djibugi ka 2-1, TP Mazembe ea DRC ea tsoa ka lesoba la nale ha e ne e hlola Medeana ea Ghana ka 1-0. Athe ASC Kora le ASEC Mimosa tsa balapa ka seahlolo sa 1-1.

LDF e tla amohela Manonyane

Tšeliso Thakholi

Kamor'a ho bapala ka ho lekana le ho lahleloa ke papali e le 'ngoe mafelong a beke a tsoa feta, sehlopha sa LDF 'Sohle Sohle' se tlii'lo kopana le pela lifalla, ha se tla be se amohela sa Manonyane papaling ea sona ea bone ea mokhahlelo oa pele o bulang Liki e Kholo. Manonyane e bonahala e qalile lipapali tsa eona hantle haholo papisong le ngoahola. Papali ea bobeli Manonyane e ne e lokela ho e lata le-tailane Morija tikolohong ea Makhoarane ho ea botsana lipotso le bompoli ba liki Lesotho, e leng Lijabatho empa ka mabaka a ke keng a qojoa papali eo e ile thisa, kaha bompoli bane ba lokela ho ea bapala leoto la bona la pele la Mohope oa CAF Champions League. E se e tla boela e khetheloa letsatsi le leng leo e tlang ho bapala ka lona.

LDF e kena papaling ea eona ea bone e sa bapale

hantle ho hang, 'me ho late-la ka moo e ntseng e bapala ka teng ha hona ho ba bonolo hore e ka tsoha ka Manonyane, 'me e lebelletsoe ka thahasello e kholo ke barati le batšehetsi ba bolo ea maoto, eo hajoale LDF e leng boemong ba bo 11 ka ntlha-kholo e le 'ngoe kamor'a lipapali tse tharo. Ka hona ba bontša ho qala liki ka tsela e seng ntle haholo.

Manonyane e bonahetse e qalile liki hantle haholo, le hoja e ntse ena le bofokoli bo tšoanang le ba lipapali tse fetileng tsa ngoahola, moo e neng e atisa ho tatela ho itlhoma pele ka ho hlaba lintlha khahlanong le sehlopha seo e bapalang le sona, empa qetellong papali e fele e bapetse ka ho lekana le sehlopha se joalo. Mohlala ke papali ea sona ea pele le Bantu moo e neng e se e matha pele ka 3-2 empa papali ea fela li le kana ka 3-3. Leha ho le joalo, e qalile lipapali tsena ka sefutho se seholo, hoo LDF e lokelang ho ikatela khahlanong le eona. Sebopelo seo Manonyane e qalileng

lipapali ka sona se batla se fapane le sa ngoahola, kaha e le se matla haholo le hoja e ntse ena le mathata a ho tšireletsa ha e se e hlabile lintlha pele.

LDF leha e bapala ka libapali tse matla tse tsebahalang ka ho bapala bolo e tsoileng matsoho, ha e-s'o kopane hantle 'me e sa na le likhaello tse ngata haholo tseo bakoetlisi ba lokelang

ho sebetsana le tsona, hore e khutlele maemong a eona ha ho sebetsa e le sehlopha e seng libapali ka bonngoe. Se mpang se khotatsa ke hore ho tloha Manonyane e kene kahare ho Liki e Kholo ha e-s'o hlole LDF ho hang, empa LDF e se ke be ea ea lekhongoana holimo ka maemo ana, etsoe monongoa-ha ha se ngoahola.

Haele lipapali tse ling tsona

tse tlang ho bapala letsatsing la Moqebelo ke moo Lifofane e tla nkana le Machokha, LCS e bapale le sehlopha se kotsi haholo sa Matlama, LMPS e thulane le Majantja ha Villa e tla amohela Members e qetang ho bapala ka seahlolo sa 1-1 le LMPS. Haele Sontaha Limkokwing e tla botsana lipotso le Linare, Bantu e isane holimo le Mzamane ha bompoli ba liki e leng Lijabatho e kopane le bompoli ba mehleng e leng Lioli.



Roof of Afrika mafelong a Loetse

Tšeliso Thakholi

Mohloli oa ngoahola oa mo-jao o moholo oa lithuthuthu oa Roof of Afrika, James Moore oa Afrika Boroa, o tlii'o kopana le phephetso e kholo ea ho sireletsa mohope khahlanong le lipalami tse hloahloa tsa machaba tse kang Billy Bolt oa United Kingdom le Manuel Letterbichler oa Germany, mojang o thata ka ho fetisisa oa Roof of Afrika oa ho hloa matsutla-tsutla, metheo le meepa e boima ea lithaba le maralla a Naha ea Lesotho. Mojao ona o tlii'o ba ka la 23 ho isa la 27 Loetse monongoaha.

James Moore o ile a phamola Mohope oa Roof of Afrika ngoahola ho mohloli oa lilemo tse robong ka tatellano e leng Wade Young oa Afrika Boroa, kamor'a hore a hlolehe ho kenela mojao ngoahola ka lebaka la ho tsoa likotsi tse mpe tsa ho cha. Pelaelo e ntse e le hore o ntse a batla ho khutla monongoaha, kaha boemo ba hae ba bokulo bo ile ba mo sitisa ho tla sireletsa sekola sa hae.

Mojao oa monongoaha o tlahoa o se thata joaloka



oa ngoahola, 'me lipalami tse ling tse matla tse kang Manuel Lettenichler ea neng a hlahile boemong ba bobeli selemong se fetileng ka nako ea 22:31:08, o tlii'o kenela mojao ona le selemong sena. Sepalami se seng se kotsi haholo Mario Roman ho tsoa Naheng ea Spain le eena o boetse o teng hape le selemong sena, 'me o ikemiselitse ho hapa mojao ona. Ba bang ba lipalami tse seng li ile tsa hapa mojao ona ka makhetlo a mangata ke Graham Jarvis, Mitch Brightmoore le Billy Bolt Mokhahlelong oa

Gold.

Ho sa le joalo, lipalami tsena tse ngata ho tsoa linaheng ka ho fapakana ha tsona, li tla be li kopane le tsa Lesotho Mekhahlelong e fapakaneng e kenyeletsang har'a e meng e mengata Silefera, Bronze le Iron, moo tebello e leng hore Mokhahlelong oa Silifera Lesotho le tla be le emetsoe ke lipalami tse kang Basia Chabeli, Sechaba Chabeli le Moiphepi Bereng, ha Mokhahlelong oa Bronze e tla be e le Timello Tšolo, Malakane Besele, Katleho Tlhaole le Joseph Mote-

nane.

Athe Mokhahlelong oa Iron e tla be e le bahlanka-bakang Hlaoli Lesekele, Thabo Monaheng le David Salley. Lipalami tsena li ne li ntse li emetse naha ngoahola mekhahlelong ea tsona. Litlholisano tsena tse seng li behile Naha ea Lesotho 'mapeng, ho tloha ha li qala ka 1967, Lesotho ha le e-s'o hlole ho hang. Joaloka kamehla mojao oa monongoaha o tla qala ka liteko tsa linako Ha Leb-amang tikolohong ea Roma, moo kamorao ho phethela karolo eo, ba tlang ho qa-

lella ho hloa libaka tse thata tsa naha ea Lesotho.

Ho ea ka ba bang ba babohi bao mojao ona o tlii'o feta libakeng tsa habo bona, thahasello e kholo ea ho tla boha mojao oa monongoaha. Ba ipiletsa ho lipalami tsa Lesotho ho sebetsa ka thata ho tla hapa mojao ona. Ba boetse ba etsa tlhokomeliso ho sechaba haholo-holo ho balisana ho bona hore baeti bohle ba sireletsehile, kaha kantle le hore ke litlholisano o boetse o phahamisa moruo oa naha, kaha o kenyelelitse le bohahlauli.

'Ba na le monyetla leha ba hlotsoe'

Tšeliso Thakholi

Mokoetlisi oa Sehlopha sa Naha sa Papali ea Beach Volleyball, Monghali Moholo Lekomola o re sehlopha sa habo se ntse se ena le monyetla oa ho phunyeletsa ho ea lipapaling tsa li Olympic tsa Los Angeles 2028, ha feela se ka atleha ho sebetsa hantle le ho bapala lipapali tse 'maloa tsa FIVB Pro Tours le CAVB Tours.

Lekomola o boletse tsena 'mokeng oa baphatlalatsi ba litaba o bileng Ntlo-Kholo ea LNOC, Maseru, mafelong a beke a tsoa feta, moo moifo o neng o etelletse pele mokhethoa oa naha oa Beach Volleyball o neng o fana ka litlaleho tsa tšebetso ea ona, lipapaling tse tsoa feta tsa African Beach Volleyball Championships tse bileng Naheng ea Egypt ka Phato monongoaha.

O boletse hore leha sehlopha se hlotsoe ho phunyeletsa ho ea lipapaling tsa li-Olympic tsa Los Angeles 2028, leseli lona le ntse le le

teng la hore ba ka qetella ba atlehile ho latela tšebetso ea bona e ntle litlholisanong tse tsoa feta. A re sehlopha se phethetse lipapali tsa sona se le boemong ba bo robong 'me seo ke tšebetso e ntle haholo.

A tiisa hore leeto la bona la ho ea lipapaling tsa li Olympic ha le e-s'o fele, 'me ba tlii'o sebetsa ka thata ho phethahatso toro ea bona ea ho phahamisa folakha ea Lesotho lipapaling tsa Los Angeles. A supa hore ntho e 'ngoe e tlii'o ba thusa ho ba bulela monyetla ke ho bapala lipapali tse 'maloa tsa FIVB le CAVB, kaha ba tla tseba ho bokella lintlha tse ngata ho matlafatsa maemo a bona mathathomong a tikoloho ea Afrika le a lefatše.

A qetella ka ho thoholetsa sehlopha sa hae le ho tiisa boikemisetso ba sona ba ho tla sebetsa ka thata ho feta pele, e le ho itokisetisa litlholisano tse ngata tsa machaba tseo ba tlang ho li bapala e le hore ba tle ba tsebe ho kenela lipapali tsa li Olympic tsa Los Angeles 2028.

President ea Mokhatlo oa Lesotho oa Papali ea Volleyball Monghali Hlapane Tšehlo o thoholelitse le ho lebohela moifo ohle o bileng Naheng ea Egypt ka ho sebetsa ka boitelo. A ipiletsa ho Lekala la Lipapali, bahoebi le batho bohle ba boithatelo bo botle ho etsa letsoho la monna, kaha sehlopha se ntse se itokisetisa ho tla kenela lipapali tsa

CAVB le FIVB moo se tlang ho qothisana lehlokoa le tse ling tse matla tsa Afrika le lefatše.

Motsamaisi oa Sehlopha Mofumahali 'Maletetekoa Sekhonyana eena o netefalitse boitlamo ba sehlopha, ba hore maikemisetso a sona ke ho sebetsa ka thata e le ho etsa hore Basotho ba be motlotlo ka sona. A re ba boetse ba tla tsoe-

lapele ho ntlafatsa papali ea Beach Volleyball. A ipiletsa ho bohle ho tšehetsa sehlopha e le hore se tsebe ho sebetsa hantle.

Sehlopha sa naha se bo-piloe ka libapali tse peli e leng Neo Chapole le Mo-roesi Tolofi, e be mokoetlisi oa bona Monghali Moholo Lekomola le motsamaisi oa sehlopha Mofumahali 'Maletetekoa Sekhonyana.

